

壹

齋

集

金生九年從同里鍾寶園先生游先生偶他出同塾生有應童子試者效學使者考試爲戲錢口占五字詩四句誚之方擾攘閒而先生至爲答同塾生而宥錢且出告於人曰是子長必以詩鳴明年先太夫人棄世寄居外家六年小時了了者忽懵然矣又四年稍稍進學補縣學生又三年爲學使者朱竹君先生所激賞挈游京師自是而奔走衣食殆無虛歲其旅居道路窮愁抑鬱悲憤無聊之狀悉寓之於詩蓋不啻千有餘篇矣通籍後觀政戶部未一年告歸鄉里爲書院山長者十年嘉慶庚申蒙

恩以戶部主事著在懋勤殿行走甲子又蒙

特旨改官贊善入直南齋十年之中五持使節計所得詩又不下千有餘首閒自刪定合而存之亦敝帚之享耳至寶和

壹齋集序

宸章曾經奏御者別爲二卷不敢闕入私集老矣不能副鍾先生昔日之望姑卽以是區區者實先生之言其亦可媿也夫嘉慶二十年歲在乙亥夏六月旣望當塗黃鉞左田氏自識於澄懷園之直廬

古者詩人至李唐而極盛而唐詩人顧罕達獨高常侍以通顯稱此昌黎韓子論詩所以有權愉難工愁苦易好之說也大司徒當塗夫子少以詩名天下中年登第以戶部主事告歸主講席且十年其學益遂嘉慶初被

召直懋勤殿旋又改官翰林直

南書房

今天子嗣位又當機務之重參贊樞廷比者在告食俸猶勞天子念慮數以公家居狀詢近臣三十餘年中上承

兩朝之殊眷下爲海內文章家所宗仰其遭逢之盛蓋非唐高常侍所可等夷意其詩固多權愉之詞不以愁苦而始工矣而公之自序乃謂通籍以前其窮愁抑鬱悲憤無聊之狀悉寓於詩卽嘉慶庚申以來其詩存者無慮數百篇類皆溫深徐婉理

得情當其氣充而不溢其色曜而不浮其言則累萬千而不可厭然後知公之學超然出乎流俗聲華榮祿之事舉無足以奸乎其中而變其窮塞所守故其境愈通志愈堅而詩亦愈日進詣力之所至固有山林枯槁憔悴專壹之士爲之數十年而不能工者然則其詩雖未必皆爲愁苦之言亦終未嘗務爲懽愉而求其辭之必工也公將以庚辰以後詩續刊入集而命耀椿爲之序耀椿從遊久竊恐後之人知公之遇讀公之詩徒侈嘆其盛美而忘其詩之所以爲工乃舉韓子之說進焉若謂耀椿遂足以知公之詩則非小子之所敢居矣道光十年春三月門人安邱劉耀椿謹序

左田八十五歲像
上杭廖富生寫
款王秉和鐫



幼失怙恃長游四方五十
紀古老婦

朝堂無益於人豈補於世
不窳而矜卿以自媿

道光甲午夏四月壹齋自題

壹齋集目錄

當塗 黃鉞 左田

卷一

古今體詩四十五首

卷二

古今體詩五十首

卷三

古今體詩四十四首

卷四

古今體詩五十六首

卷五

古今體詩五十七首

卷六

古今體詩四十七首

卷七

古今體詩七十四首

卷八

古今體詩四十五首

卷九

古今體詩四十八首

卷十

古今體詩六十四首

卷十一

古今體詩五十六首

卷十二

古今體詩五十八首

卷十三

古今體詩五十七首

卷十四

古今體詩六十首

卷十五

古今體詩五十七首

卷十六

古今體詩三十六首

卷十七

古今體詩三十七首

卷十八

古今體詩四十二首

卷十九

古今體詩六十九首

卷二十

古今體詩九十一首

卷二十一

古今體詩五十九首

卷二十二

古今體詩七十三首

卷二十三

古今體詩四十六首

卷二十四

古今體詩七十五首

卷二十五

古今體詩六十二首

卷二十六

以下續刻

古今體詩八十一首

卷二十七

古今體詩六十四首

卷二十八

古今體詩九十三首

卷二十九

古今體詩五十三首

卷三十

古今體詩五十三首

卷三十一

古今體詩六十一首

卷三十二

古今體詩四十二首

卷三十三

古今體詩四十八首

卷三十四

古今體詩六十一首

卷三十五

古今體詩五十首

卷三十六

古今體詩四十三首

卷三十七

古今體詩七十三首

卷三十八

古今體詩五十九首

卷三十九

古今體詩五十八首

卷四十

古今體詩二十二首

壹齋集卷一

當塗 黃鉞 左田

古今體詩四十五首

乾隆壬辰
至乙未

入夏

入夏眾芳歇空餘三徑香
開軒閒淪茗細雨看分秧
梅子黃依樹菱絲滿塘
星星隔簾語雙燕晚歸梁

秋日同人游荆山泛歐湖用昌黎南溪始泛韻

振策陵西山目擴心愈遠
淡雲流素天清露濕秋坂
稍稍竹枝交團團松蓋偃
曲曲苔磴高行行游足蹇
靈宮穴巖棲藤蘿互牽挽
山僧亦山農種藝麤足飯
壓肩新稻香欣然刈熟返
因慚不耕食學稼悔已晚

雲根下百尺清駛何悠悠
言棄赤藤杖同上沙棠舟
竿簪挂舵

尾茶鐺置船頭偶適興來意非關歸去休鐘聲度林樾邨煙散
平疇豈不旦夕念懷茲今古憂中流隨所之采蘋還自由伊人
去已遙宿鳥何處投扣舷發清嘯古木悲高秋

望望南山下犂确多古蹟蒼然爭開張大書勒寒壁

石壁勒寒壁二大字

爲元歐陽圭齋
令蕪湖時所書

清泉灑飛雨餘字沒入石惜哉五百年虛牝黃

金擲嘆息起投篙水淺不盈尺同帆礙菰蘆到岸易撐刺山月
一何明湖波一何激顧我二三子睠彼山水役

卽事

言尋文字飲獨倚水雲筇久與故人別何當雨後逢柔風上秋
水新月下疎鐘邨店休辭醉茅柴酒正濃

乘月過古香精舍訪蕭琴客不遇

秋風吹明月清光羅幽林泠然下寒露不覺滋蘭襟隄高湖水

緜葉落谿橋深短籬足黃花入門多清陰眞侶具茶果趺坐同
酌斟鑪煙出雲房古壁懸素琴孤雲何處飛苔砌空行吟撫景
送征雁遙憶山水音

郊游

偶踏青芒履同過黃葉村賞心隨伴侶選勝設琴尊微雨花穿
屋寒園水抱門遠懷愁莫慰一雁落黃昏

擬謝宣城詩三首

歸雲冠遠樹修篁韻涼天臥此石上月聞彼風中弦裴回愜幽
賞清聽淨林泉泠然擴眾慮煙定孤鴻還

聞琴

松門次春洲結構何幽絕本非棲靈異聊此樂清樾花寒發舊
杖庭空足新月撥雲虛牖橫理徑清風發薄游行當歸暫出難

爲別

治宅

深雲蔭高閣微雨飛遙天平生未早起眾作羞獨眠攬衣一以
眺山積如朝煙已滋平疇綠旋見澄波濺花叢濯紅蕤草際團
綠錢心跡寄偶爾俛仰何悠然望遠眷友生懷古思名賢但覺
戶庭白不聞林鳥喧觀朝雨

與邵鐵君士鑑游楓林

餘雲改暮色照耀眾山紫及茲清冬游坐視霞標起林臥池中
繡霜翦風前綺歲蕤秋芙蓉閒次春桃李所悲夕陽下重以芳
草靡花榮無久春葉落不定水姱容遽幾時景物空和美言懷
重峭松青青自終始

少僕曹慕堂先生招集艸橋修禊

溥游倦塵霧山水望難極幸茲元己辰禊飲草橋側尊卑驚若
煙桃李紛如織林香浥露光塘春淨花色微波泳游鱗輕雲冒

歸翼柳風一何柔清漪一何直
眴此今昔情忘我故園憶不必
永和人千古攬超特

泛舟二牖

驅車東便門日麗春城曙
息軌面清漣理櫂撥春霧
凝素低行雲新綠潤芳樹
已懷逝川思復愜濠上趣
澤蘭若可搴莫謂繁華暮

橋陰上流急築版背前津
稍近亂飛雨漸遠淪魚鱗
羈心豁遠目滉漾難爲春
酒香泛翠艸水氣浮青蘋
試此樂心賞況復相知新

醉歌

碎霜糝瓦魚鱗皴芙蓉煙冷
留香魂老雅怯寒叫壁月小
雁惜影低銀雲缸花幽咽泣
紅淚淒然羈夢忘冬春啾啾
蛩響苦無

力幽蘭弱蕙愁氛氲無金可鑄五湖長有絲難繡平原君興酣
手攬義和轡大聲呼救蟻蝨臣聲高氣壯通天門酒星捧詔來
蒼旱展旗驅入醉鄉去斗杓倒汜駕漿醇嬌蛾秀靨萬花簇笑
拂衣上眞珠塵百二十刻仙緣促強摘蟠桃樹陰綠玉烟翠霧
胷青琳略鯁濃香一生足尖風入袞翦癭斷碧落無聲大星燦
可憐天上愁離別一聲雞唱江南白須臾酒氣化長虹吮墨濡
豪和惱公

憶阿鳴

振觸羣兒戲因之憶阿鳴昨來剛解語近說已能行書尾頻知
問呼耶若有聲足徵天性好嬌小可憐生

祀竈夜抵雄縣

遠道暮投宿如兒望新年心知畏人誑計日常縣縣我從新城

飯言就雄縣眠手書清夢覺拭目黃沙填殘陽戀枯柳灼如桃花然稍聞犬吠人漸見邨炊煙滿思城郭是過此仍非焉是時日入地寒氣盤空旋嚴颯善細入與骨相糾纏倦僕但酣睡屢促始一鞭初更甫到郭鎗火紛喧闐驢鳴雜鄉語扯客爭相先破竈當門支土坑比鄰連鋪牀置羹飯少食腹已便苦樂僅一時如隔夙世緣驀驚酒果具祀竈古典傳老人氈帽厚再拜還致虔嗟我缺二載顧此心如煎安能丐司命共醉升青天罡風驅我下落我枯桑顛何須冒風雪行役爲人憐

夜發柱平三十里鋪至銅城驛大雪失道

遙天零素霰大道何漫漫傷哉遊子行犯此深夜寒仰視同雲密側聽悲風酸尋途雪封軌鞭馬冰合鞍不識故路迷但覺天地寬停驂問行徒誤對樹影攢表回憩中野童僕相驚嘆遙聞

狐狸嘯幸及荏苒安

時王倫之亂甫平

天明遵正路呼渡鹽河灘因思

務歧趨終必遭險艱

乙未正月十三日夜歸自京師

入城鐙市散有客正還家新僕欲通姓嬌兒不識耶清光滿茅屋喜氣上燈花乍見翻無語裴回月正華

亦知兩載別那得怨睽離奈我家多故于貧苦不宜客衣塵尙

漬鄉夢醒還疑但覺琴書熟相看似昔時

時移居城內

更有難忘友宵分獨欵扉聞聲知我至握手覺心飛兄弟如君少琴尊經歲違豈無明日在談久忘初歸

古桑行

我歸未幾花木香扶疎生意看柔桑春風一吹萬葉綠童童漸欲遮茅堂城西樹少曉禽未獨此飛鳴時悄悄何必成都八百

株居然十畝陶潛宅人言桑葉飼蠶好取彼斧斯宜及早莫使
青條碧樹濃坐看紫甚黃鵬飽我本江頭獨釣人歸來那惜甌
生塵賣絲買穀何曾慣留取清陰護四鄰

次韻湖亭晚歸

草淺波平碧欲通竹櫺齊展一亭空同傾桑落酒光紫細數木
瓜花蕊紅小艇自流初佳雨袂衣難受嫩晴風劇憐新柳人家
好指點湖燈曲苑東

渡江五十里至和州北渡橋遇雨卽邨店所見聞者演
爲五字詩寄諸同學

疾雷驅暴風四野皆怒吼高原揚黃沙密林頓深黝僕夫曳輿
飛用力全在拇十步作五奔始及渡橋柳踉蹌入店門雨點大
于手升堂紛喧逐雜坐半坭爰是時方久晴得雨如得酒歡然

眾心醉滿意潯眙傾盆聲更來拔屋勢欲走幕使雞犬驚恒
怖屋椽朽對語不相聞自申持及酉中間一老翁齷齪面形醜
自言含山居結構昭關後野語說古今任意指爲某頗聞城中
人驚豔傳榜首珍重狀元名項縮舌伸口滿室盡傾容揶揄一
時久瞥見三人來其二械交紐相目爲偷兒繫頸如牽狗竟不
憚衣冠公然連臂肘須臾雨稍殺堂黑蟲母嘔耕叟睡縱橫如
畫卦奇偶主人延我去房大不容斗那辨風雨雷兀自一燈守
忽聞捕者驚偷兒脫其杵急持火燭之蹤跡竟無有乃知風雨
時鑿破山牆厚譬如池中魚穿穴逃敝筍哄起堂中人鼾齁嚙
相咎乃促僕夫行雨歇月在牖平明至姥下書以寄諸友

姥下鎮

仙姥知何處空餘此故墟雞籠猶化石門吏久爲魚市早居民

集驢鳴邨店虛長街淨如拭初日上肩輿

和州

官橋跨柳市野水入城濠好雨一時足新潮三寸高牆花開石
竹園果落山桃安堵無遷志居民頗不勞

近郭人家少荒園散若星沿城隍菜甲入市半庖丁曲巷樹交
翠招涼門不扃重尋留壁記花落使君廳

張文昌故宅

今爲百福寺

幽居改爲寺此例多詩人雖非古林樾差勝委躡塵緬懷張司
業緩步通淮門禪房互鱗次精舍不復存庭槐綠成市午磬敲
層雲興歌怨女曲載詠江南春清辭壓元白古澹無其倫至今
烏嘯切猶似樂府新

劉夢得陋室

使君一世豪絕調古今仰奈何急功名竟坐伍文黨我讀陋室銘清尚絕塵埃今來歷陽道披幽遍榛莽依治數武遙小築一畝廣水蒨初作花新蟬未成響草色自青青苔痕依舊上不見室中人風流屬誰賞

同沈東梁憩準提庵

濃陰如幕綠低牆共訪幽棲話夕陽竹徑一行容客入水亭三面受風涼白蕉衫短輕無汗紅藕花開少更香斗覺此心除結習可能隨分借禪牀

秋夜病不能寐起步古桑墅中

殘月滿虛室清寒浸秋水微颺漾庭陰掬之若爲起病夫中夜興長廊怯虛倚墜蕉露有聲繞閣雲何綺幽光遽潛移蕩澹流波靡欲坐寒不禁竟睡情難已門鼠翻藥爐缸花落書几會得

病中緣可悟靜者旨

贈邵友園

士燮

邵生清尚解紛拏半生嗜畫如嗜痴五十之年忽已至瘦骨雖
立神不差窮愁奮筆寫林壑眼前供養皆煙霞柴門槐花積一
寸草堂桂幹枯三叔匏暉插架者百軸常恐變化飛檐牙每當
書塾散清課短衫剝豚頰陽斜下階縛帚淨掃地溫言教婢餘
新茶挑燈拂紙事慘淡妙境直落天之涯南風吹蠶雷滿室奇
癢在背忘搔爬老妻寢瘵或疲耗稚子嚙語時呼爺寸管一擲
萬事了有耳不聽閒咨嗟燈昏月黑漏三滴猶自良背窮幽遐
圖成一幅面壁坐對影反覆求疵瘕忽然有悟得幽妙無人可
告空哈呀自疑卞和始獻璞又若舍人初成蛇便思芒屨踏五
嶽誓欲足繭丹山崖

廣韻九麻不收崖字柳州詩於麻韻鋪牀凡兩壓則知唐韻九麻固有崖字也

拂席始就睡往往聽徹迎晨雅我無畫筆解畫意有時點墨成
鮮葩今君篤好志無敵令我退讓禮有加往年曾讀摩詰傳雲
樹石色新書誇探微六法首氣韻一洗繁重歸精華那知俗眼
重形似兒童之見爭喧譁妄將皴法強分別若者斧劈誰披麻
士夫之畫只一筆五山十水何爲耶寬乎逗乎甯必肖無聲閒
寫春風賒門深巷曲少人跡我時臥病剛新瘥荒園昨夜山雨
足扁豆破莢壺盧花下簾自詠詩成帙十日未出秋滿家隍糜
一斗研相待煩君作畫縣了又

同友園初秋夜坐

庭蕉冒檐舒棲禽圍竹聚秋氣集蕭齋空濛散飛雨颯至衣仁
涼灑地點可數幽人居比鄰修夜杖頻拄樺燭代涼蟾山茶敵
醇醪孤賞寡所歡長言易爲苦露葵實已繁寒瓜藤欲瓜候蟲

不爲秋空階何獨語

八月十四日夜同邵友園兄弟施孝廉

道光

家兄裳河

隄看月

佳月同游厭俗喧卻來清話立河壩市燈大上人爭聚

蕪湖中秋前後

六日滿市張燈

賈舶空寒客早眠落葉舞風團峭坂淡雲寫影入清漣

從知良會無逾此何必紅樓醉管絃

秋旱束謝學正

登雋

年例重陽近滿城風雨深今秋倏云暮一日未曾陰畦稻空垂
實籬花強放金登高雖擴目望歲頗驚心

聞鄰人烹犬戲作

我居之南鄰有屋僅一厦平肩短垣繚借蔭古桑而主人未相
識聞聲知不雅取帚時詆譏羹肆嫚罵遲明啟寢扉叩門

聲問嬌女汲井華綆斷急呼姐昨來賃此居鳬鴨喧春夏撼撼
秋宇涼稍稍言語寡山齋薄莫虛衣帶寒颯惹林疎繁翠彫籬
茂新黃冶薦驚舉族狂如獲奇珍者自言東門來有衆觀如堵
蒼犬緡牽頭白梔人在把捧喉赤豹哮碎首桃花灑昔恃守門
功詎肯出其髀今雖搖尾憐不免當頭打食頃礫復來爭買傾
邨社我從旁朵頤青錢喜不假探囊三十餘乃得此一蹀牛呵
知不能蚊聚可聊且燂爍爆濕薪奇偶支飄瓦主人咽睡頻穉
子垂涎下相商水淺深互戒釜傾寫甘擬象豹胎鮓鄙癡龍鮓
燈光睽上牆人影走如馬衆噪聚一轡有口皆暗啞因聞喘似
牛想見顏渥赭更闌始寂然惡少咸歸也我悲羣兒愚痼疾中
心痼戒殺豈遠庖無故非祝嘏佛法與聖經二者相搏搏竟類
乞兒貪甚欲性命捨不知秋嘗麻原自登舞雩禮本先王垂語

斤齊東野餘景林杪移殘淚燭灰炮作詩告友朋聊以供一嘲

鄰女

鄰女生殊豔金閨常晝局可憐迫遲莫不敢說娉婷促柱驚孤雁觀河感二星年來珠淚盡永夜每愁醒

計拙

計拙從人諂居閒亦自嫌賀貧無叔向止酒學陶潛歲儉邨春寂天寒巷櫟嚴唯餘書一帙坐臥此身兼

雨雪連朝閉閣獨坐裘回之餘唯事吟詠成非一時故語無倫次寄城西諸友

寒雨織簾腳清流迸瓦溝雁聲柔似鷁小閣穩于舟半壁游仙書經年解扎裘常持一瓢酒消此百端憂

舉室靜無語唯聞穉子譁空堂憑劾鼠廢卷儘塗雅撥火尋灰

芋塞帷數雪花復能知韻事奪扇煎茶

凭檻弄雲影臨街無屐聲桑枯條更勁窗濕紙逾明高詠居閒
適清狂世俗驚但能無屢空常此掩柴荆

向晚添爐火消寒手一編重簾通酒氣深竹引厨煙香輒桃花
米新鮮楓葉編欲邀故人飯冷雨忒綿綿

惜別憐交少問年驚歲徂癡雲堆厚絮飛霰散成珠此日荒城
限良時對影孤掩窗清不寐一任漏盈壺

短檠原吾分長歌不諱貧自慚生事拙誰識性情真衾冷思加
絮醅香憶漉巾茫茫江縣白尙有遠離人

冬曉望積雪

今晨窗白早怪此鳥聲寂微聞策策飛心知雪深積迎寒起塞
帷千里快一覲遠山如出雲迷漫不見春眴茲皓耀觀使我煩

憂釋此時到柴門尙未有人跡

壹齋集卷二

賞塗黃鉞左田

古今體詩五十首

丙申至
庚子

雨中對桑

暮歷繁陰重春寒細雨零自非生陌上一任綠中庭萬箔蠶初起提筐人未甯誰能罷采采使爾獨青青

薔薇

砌草密如繡春霞半扉紅高花綺鄰樹低葉交池風雲鬢朝歲蕤蘭缸夜冥濛芳尊隔雨傾香氣遙相通

南郊望耕者

清和際麥候氓歌動平疇新塍繡青苗芳柳垂滄州插籬花覆門闢館窗臨流把犁遍原隰腰鎌充道周田禽亂水白邨曦載

烟浮念茲熾奮勤輟我邁軸憂服田昔人志食力吾生休相期
足杭秬及秋交獻酬

江邨初夏

風過秧田翦綠齊幾家茅屋隱橋西含桃罨網紅千樹乳鵬暖
萍黃半溪衣潤漸知梅雨近松圓坐覺午陰低今年豆麥春租
足努力南山帶犢犁

讀唐書記老子事

遠尋龕象煩官吏精砥瓊瑤貌聖容卻笑神孫貪舞馬那知老
子本猶龍

辛苦哥舒石堡城奇功竟爾屬神兵如何旦夕潼關破不敕天
下一隊行

容易靈符擲故墟揮豪不似跨牛初關門舊尹曾知否應悔當

年強著書

秋夜漫興

鐙火雖可親蚊蚋猶滿屋起翻案上書竟夕不能讀移步下周
除白露霑我足涼葉動商飊耿耿咽殘綠
秋花善賣緣一雨長一尺老桑不加高童童抗檐隙生質不百
年得意只朝夕輕霜勿遽飛使我三徑索

蓄金鯽苗數頭於沙瓮中比長二寸許感而作歌

天影一碧明鏡澈珊瑚滿瓮紅可罾寢扉乍啟忽驚沒但見水
上圓文增手搯蘊藻去縈帶要使鱗鬣皆上升今年夏初偶乞
得數頭纔及杯水勝小蟲無名亦無數噉啣到處遭欺歎五日
十日或不見一寸二寸相因仍豫愁破讐霪雨至刮目相待何
敢瞪蛟龍自是此輩化戒勿輕藝看飛騰俄驚顏色變炫耀說

人以質殊堪憎局促知無湖海志品題空被金銀稱俗有金管銀管之號
所欣倦眼有時活憑臨不負晨朝興我昨京輦恣游矚金魚池
上車輞轉碧潭無聲動千百如花落水流無憑卽今山園事披
翫尙記投餌當年曾東坡南屏散齋檻十五載後猶重凭物情
有觸意難釋人生無戀夫何能

立冬日登范蘿山翫楓葉憩古香精舍

良辰際元英平山澹晴旭佳游集清朝人影散林麓繁霜一夜
新紅紫冒邨谷坐澗說妍光緣崖攬遐矚芳途不知迷野蝶導
前躡白雲生客衣寒竹寺門綠微颯振修竿撼撼掃山屋誰歟
抱冲襟一徇此幽獨

宿友園書樓不寐

夜色滿衾席悠然一片青小樓延萬籟衆慮集初醒反側厭邨

櫟嘉微望曙星荒雞知客惱臍膊上疏櫺

教阿鳴識字感而述此

我生于六書微光略窺竇叵堪同學希半爲俗所狃有兒生五
年齡岨尙孩幼癡心顧器貌謂可肯堂構幸非雍端愚大類衮
師秀家貧戲具無鳩車不能購斷墨當龍寶片瓦擬鳳咮有時
乞禿豪如貧忽奇富鵲喜無不爲雅塗徧衫袖我晚書塾歸呼
耶筆門候筆花頰面汙墨瀋書窗透母惜父亦憐未忍加誚謖
因之投所好筆讀閒相授始令識偏旁近亦能左右精神時有
分梨栗出以佑于今已市旬十文無一漏我醉或陶然顧兒爲
兒侑六書古小學髻鬢必根究李鉉年九齡月餘通急就漢律
僮十七乃諷九千籀今人譌替滋點畫輒紕繆徇俗號稱通復
古反遭詬史倉旣不生邈斯亦難覲中間數揚雄奇字醬瓿覆

岐疑童烏兒惜哉不能壽自爾韓昌黎好古意亦厚爲文宜識
字斯語可三復教子通古今不學例禽獸奈何生兒愚竟致金
銀陋咄咄名父子尙爾殄華胄伊予亦何人安敢恤其後念汝
猶聰明時失不可救汝耶如汝年熒熒方在疚號泣隨先慈懔
懔失昏晝譬如崩洪鐘有筵莫能招哀哀二十年此恨填宇宙
汝其大吾問一拜王父柩區區識字心勿令獸墻走掩書放汝
眠殘燈小如豆

春夜與邵友園兄弟家兄補之論畫

茅堂夜靜月當牖春山歷歷在吾手五嶽三壺一筆收探奇枉
踏芒屨走從知論畫易不敵作畫難譬如家居人罔識天地寬
冰天雪窖足未至坐曝風日甯知寒我今有語爲君談畫山須
畫江以南更思筆墨皆我用慎勿與心離爲三古來士夫閒游

戲剩水殘山聊寄意筆具詩書墨有華俗人未許窺其祕公等
所學皆不凡吮豪日夕如貪饑但須心存目想會得古人意自
然腕下蕪穢皆潛芟世閒好事無事無矜慎何如只自娛庸史
紛紛安足道附名簡末胡爲乎嗚呼附名簡末胡爲乎不聞閭
令文采爲畫掩岸側俯伏羞爲圖

雨渡

貼水小舟自蕩臥橋樨柳初稊竹裏山雞笑我朝朝滑滑春泥

過野老草堂憶亡友吳秋嶽

嶽

月好纔升屋堂空不見人劇憐梅樹下夜夜濕如銀

三月四日郊行作

草淺沙平負手行溪田足雨莽春耕風光驀見辛夷放農事欣
占甲子晴

是日

歸雁雲中行斷續游人花外語分明若教卜得

臨湖宅水檻山茨過此生

卷幔

卷幔月幾望懷人夜未央歸飛感烏鵲借蔭惜枯桑原憲貧兼
病次公醒亦狂羅門早閉散帙映清光

三月望日余懷谷

熙

招飲西園出示所作祔器賦五十

韻贈之

余侯鄒衍徒骨相特奇峭連鬚髯且蒼麗視目微眺昔爲龍眠
樵今作湖陰釣賣藥隱市門十病常九療吾翁與若翁當年德
更劭二父雅相親二子亦同調今晨湖山晴導我西園覲啟門
闢榛莽掃室豁宦窳風楊斷檻垂水竹短垣繚喜遺買酒錢渴
忘烹茶銚引巾拚席坐祔器出相詔渾儀圈周遭測表線環繞
遠疑相輪轉近訝紡車掉以木不以銅劇小復劇妙設喻前聖

精制器後賢肖天地一卵如日月雙丸跳殫彼十年心寫此九重
重照其餘二三器各各有師紹布算籌尺準測晷日星耀是時
剛酉初爲我指羲曜離地十五度儘可事吟嘯佳兒甫八齡容
止殊僬僬使之誦周髀頭直不容搖辭與讀頗難快若風卷燒
因論所著書君著有八線表若干卷義在不攘剽把讀凡數過但譽未敢
謂器精有如斯書傳定可料余侯一掀髯叉手忽狂訕聊效儻
忽愚敢鑿渾沌竅子才如利鋒光氣常在鞘錫以瑤華篇庶可
增要眇我生昧朝昏如魚處魯罟書禮垂天文披諷舌恒矯矧
隸首商高絕學更竒祿漢魏唐宋元眾說亂沂韶有明當末年
中西互紛繳書成國社屋棄置安足弔我朝

聖人與手握造化要宛陵祖孫出

宣城梅徵君勿庵文穆公循齋

一時被榮召

抗行平子張長揖文起廖昨從公子游竊聽才能聵贈我遺書

歸若食不能噉昏昏軫蓋中誠如竹垞笑繫古六藝末服習恒
在少唐制明算科多士羣騰越宋初設厲禁私習等劫勳譬彼
局太倉民饑穀不糴方今四庫開徵材到蓬藿君技真雕龍我
詩乃螢爝起看七星斜揮杯且同醕

雜詩

史遷述貨殖豈果羞賤貧陶公詠貧士亦匪陳苦辛薄俗重錢
刀禮義無由申發爲慷慨言用以思先民後來昧此理謂是羞
成嘆遂令黃白術亦得稱仙人

天梯不可階誰歟飛步躡方朔狡獪兒拾級足殊捷指揮上瑤
池見者心盡惴吁嗟爾勿惴謫落在俄雲

劉君賦六合大愚不可又陸生擬三都傖父已先就窮愁思著
書力學反遭詆知幾其如神深藏乃善賢

吾慕朱桃椎隱居躬織屨置之大道旁米茗不須索食力固自
甘代易者何樂乃知行路人德義亦不薄相士失之貧背者有
東郭

古人重骨相須眉期不朽姿神儻清嚴豈必倭人憫此風盛魏
晉評隲常在口或爲瓊樹枝或爲春月柳行步時敲斜粉白不
離手君以譽其臣臣以媚諸友所以梁蕭韶乃有斷髮醜

湖亭消夏

湖山烟乍泮一幃畫初又水檻虛如艇風楊絲滿家雙文方眼
簾五色鎮心瓜喚取奚奴載柴關先客撾

旱甚湖痕淺芙蓉薈未增

今歲閏六月

已稀新翠葉那有醖紅菱鳥

浴雲全亂魚鉤竿不勝三農方坐困幽興愧時乘

一房山課畫

一房山湖上水榭也

一房山色翠模糊佳客招邀六七俱得地叢篁旬過母掠波雙
燕午將雛茶盃酒榼擔徐至文史笙竽各有娛此會西園應不
減龍眠逝矣倩誰圖

獨酌

拚作公榮飲誰窺仲蔚園莎雞依礎澀土鴨隔城喧浴罷鞦韆初
繫風來幔自掀持杯仍散帙隨意兩三番

春日懷邵東田

士鈴

金葉山

鐸

家兄

裳

金陵

晴便看花雨閉關此間殊樂那思還定知不滿登臨意燈下猶
摹建業山

葵蒿

腸肚習蔬食酷類深山僧得飽筍一束樂若超三乘當其蘢未
茁蒿蕒差堪勝江南固澤國水草春茵芳青青僅扶寸如髮齊

鬢髻瑣瑣狀難述一一疏未能咄哉此小艸在昔羣經徵箋詩
漢廣見釋艸爾雅稱或云生可啖或云茹可蒸或翹然漸洳或
蓊然清淥淪菹吳酸擅鱖魚江東曾莖纖陋藝薑葉嫩欺菠薐
芹碧坐泥浣韭黃以葷憎懿茲清潔姿命彼盤匱登崇桃頰霞
舒鱖魚銀刀胥薄采莫爲禁論價欣不增沃以苦酒漬鹽以晶
鹽仍尋常畀竈妾咄嗟能立膾茅堂新雨足缺月窺窗楞饗客
不速至饑杈爭相凌果腹盡一器濁酒傾三升乃知歎芟嗜篤
好元無憑客言若且息我語君宜懲最工發痼疾止止無誇矜
我聞蒿醜繁有黨咸良朋幡以白義別同以蓬聲夢萃能使鹿
仙艾能令疾興采藥與蕪蕭皆爲祭祀承古人儻不重曷以盛
豆甌自從食經闕服食恒僂僂本艸束高閣食醫半無恒若寒
涼溫補亂涇渭淄澠孰知購也良爲用誠深宏端能黑毛髮久

食仍飛騰大哉神農氏決不欺愚眊况我素無疾底用相戒兢
斯言駭四座有目皆爲瞪壁燈焰睖睖街鼓聲鑿鑿明朝入竹
塢稚子應脫襦傾貲合兩美恣飲樓三層

雨夜留友園宿半梳閣

小閣顛風急掩窗危如孤艇撼空江今宵試擬沙洲泊便有離
心未肯降時將入都

清溜如泉迸瓦溝芭蕉葉大響無休憑君細仿山樵筆寫箇桑
顛聽雨樓

乘月泛舟偕唐再山

英

朱无咎

恆

外兄邵尹甫先生

士

鐸
同作

凍雨收帆脚晴霞起舵牙家人應露坐游子正天涯岸柳垂垂
綠村烟薄薄遮前途渾不辨涼月白于沙

濟甯舟中寄友園是日友園移居

故人今日賦移居家具應難勝一車笑我此行有底急不教同
理讀殘書

寄王子卿

澤

王郎意氣近何如安穩三冬讀有餘似爾已當槌壁歎抱才誰
肯閉門居澆寒酒好勸桑落占信風剛送鯉魚莫問旅人作何
狀長歌依舊出無車

十月十日夜寄友園

風吹街鼓響鑿鑿此際知君睡已曾若使夢來須記取黃花叢
裏有書鐙

時寓齋尚有殘菊數十本

雪夜讀梅農學正戊己近稿

宏微擅名理妙語耐深思千里故人夢

集中有三年國子師亭夢

虛誰問字官冷卻宜詩記否新篋熟寒廳過飲時

書畫供人役寒宵負短檠何方醫我俗得句比君清大雅青邱子蕭疎白石生挑燈重雜誦風雪夜三更

久不得家書憶阿鳴阿巽

八歲就外傳汝今生九年浪游知我過失學屬誰憐掩髀衣常短收書睡每先嚴冬風刺骨慎勿戲階前

嬌女生來慧牽衣記別時百憂看卽釋薄怒意先知學母偷窺鏡隨兄解誦詩折花應憶我惆悵竹笆籬

石花魚四十韻

北人重烹鮮器至逆以目際冬市有煮入饌半皆鱗昨朝過城東范叔止我宿安牀盡醉眠紅日滿窗竹幕驚食指動饒吻當有福忽聞剝啄聲急遞走長僕筠籃光晶瑩中有潛鱗伏云從

河曲來石花名所獨致遠恐失鮮以冰爲之服洞若隔玻璃隱
如罽羅縠頭尾似赤鯉未數鱗六六嗟予日荒陋爾雅讀不熟
卒遇難定名慚愧顏頗忸怩荅云卽河鯉游泳聚回洑龍門繡石
花險囑競相逐以睹得厥名實冠水之族每歲貢王廷鈞罩
不敢羈頃從遴選餘得此雙尾禿試看乙丙丁誰可伯仲叔陳
風歌衡門棲遲樂山谷娶妻亦足佳宋子非不淑但使荆可簪
何必顏如玉乃知食色性所戒在奢祝人生隨遇安願每有踰
夙卽今魚適來何幸我不速得喪類如斯詩言宜反覆急趣漑
釜鬻毋令火候蹙地蕈釘磷磷新薑花菽菽陶盤陳未安竹栴
去已倏公然飽一餐但笑無兩腹亦如魚樂時浩浩而育育我
家濱江湖牽船居在陸鯉風出柳陰到處漁舟簇棟花石首來
柳絮河豚蓄吳淞鱸四鰓槎頭鱸項縮膾殘斥登盤藥渣不盈

勿熙載但知鰻彥回徒嗜鰻當鰻與鰻刀多鰻乃傷肉美哉嘆
斯魚一洗凡鱗俗會當充敝人河流結茅屋

憶梅和梅農效白石道人雪中六解體

除日間尋山寺梅一湖寒水對門開老僧笑我成年例又爲花
神別歲來

圓照寺

壓屋濃香瀉酒尊酣吟無復故人存孤山有例當援引我欲移
花表墓門

亡友吳畢宅

檣竿燕子語呢喃穩泛紅船望翠巖怪殺中流香不斷飛英如
雪糝春帆

焦山白雲庵

風皺雨瘦臥苔牆野褐山巾尙未裝卻笑游人渾不識秋來但
愛木樨香

江南隱仙庵宋梅

亭敞紅油面面窗孤根穿蟻剝空腔六年前到花殘了惆悵而

今未渡江

和州杜師雄宅

映窗淡寫一枝橫
石叢篁太瘦生
底事今年拋卻汝
無人香滿屋三楹

鏡湖畫舫

庚子除日

甌爐瓦銚響清泉
睡足東窗日已偏
慙愧在家無此樂
公然肥瘦不知年

家書底事入冬稀
但說平安便當歸
一事定教兒女怨
今年過節少新衣

競說來朝賀正忙
自憐名刺滅猶藏
長安車馬知無分
睡過新年也不妨

壹齋集卷三

當塗 黃鉞 左田

古今體詩四十四首

辛丑至
癸卯

題陳章侯王母送桃圖

我讀爾雅四極山海西荒經西王母曾詳其形虎牙戴勝穴處
曳修尾昆侖黑水常潛靈神耶人耶尙未悉何況挽髻爲娉婷
木公有母母有名依然未了人間情不知何年創見入圖畫用
以祝遐延修齡荒唐溯自穆天子傳始謂是九靈太妙龜山之
仙子武皇內傳更詭異恍惚惟憑青鳥使僊山生蟠桃得一足
以豪方朔雖狡獪何至偷三遭要知此事戲語耳弔詭謬幽亦
可喜癡人說夢夢果佳何妨落想天之涯五髭十姨譌謬更堪
笑區區附會微矣哉卽如此圖老蓮筆斟酌古今不失實嚴嚴

氣象眼有稜狀貌正如四五十右手捧桃左手杖桃不如斗但
盈掌纖纖指爪過麻姑妄念無人動搔癢頭上翠雲冠足下丹
鳳履背有狻猊坐方起腰環環目眈眈蒼厓一吼風雨酣我欲
從母雲中驂更有一言啟阿母此去塵寰向誰壽鮮桃的的漿
欲流饒殺吳儂難到口眼前豈少牛心柿子虎掌瓜取之解渴
淡于茶青琳之字若果具此種我亦奉道餐烟霞章侯章侯汝
本仙之人貌此口定生芳津精神奕奕絹素出頓令幻誕皆爲
真盧楞伽吳道子楊庭光程修己下筆縱橫正如是我作此詩
殊迂疏世閒事有理或無更煩添寫飛瓊雙成左右侍蟠桃壘
壘千萬株從予飽啖一笑果腹歌有餘

雨具四詠

笠

黃謝筍皮織青編箬葉纔雨從頭上聽風到鬢邊回戴恐下車
揖肩疑行腳來敗時君勿棄留覆醬瓿開

履

刻木爲雙屐飛屐未足誇衝泥須露卯響石似鳴蛙古路邨邨
雪疏梅齒齒花因思阮孚達卻笑謝公奢

蓑

碧氍常挂壁一雨一番新似降江樓鶴如遭太古人和烟披瀝
背共網曬船脣好付樵青執枯荷細補紉

繖

剪紙規爲蓋論形或象芝淋滴難自覆緩急亦交持低壓帽常
礙高擎風亂敲倘教看墨戲須對攝山支

雨中懷畫社諸君

湖山一雨春無涯黃茅屋矮紅杏花水波瀾瀾齧亭足雨氣直
欲吞吾家去年此日常過此社飲招邀二三子爭將畫筆擬於
菀不知身坐雲山裏佳游勝友魂夢俱閉關聽雨空欷歔牆頭
柳眼曾青否簾額蕉心已放無

游青泛園

初晴風日佳春氣厚于釀車驅右安門山翠遠相餉羈心鬱以
舒耳目頓清曠榆柳漾輕陰鵝鴨開新漲荒園五里遙未至心
已向徐見次水門稍出賣酒望官蛙穉有聲野水綠無浪危亭
冠高岑西山列屏障雨餘嵐氣澂鉤勒粗可狀丁香狂作花紫
白兩不讓濃香襲芳襟坐久歸欲忘仿佛綠依園鐵男戴氏園昔者
春游暢提壺傾濁醪地僻酒膽壯斜陽照酡顏任意發高唱歡
悰殊未央離懷且姑放

憶昨

憶昨白門返江鄉春欲殘故人止我宿翦燭到更闌小雨晴榆莢柔風綻牡丹周回書楊語只勸去長安

懷鄉口號

三閒瓦屋半樵桑卅本芭蕉一丈薺置我此中元太過也應畧省輭紅香

空濛雲水雨偏奇三面湖亭課畫宜人比沙鷗閒較甚那能不憶邵僧彌

謂友園

客窗臥病寄友園次梅農暑雨見懷韻

黃楊本是我家樹我病卻同厄茲月綠簾罕地晝無聲客至不迎况干謁緘愁局縮守瓜廬覽鏡髭髻驚蒜髮那堪精力役縑素畫材多可供人襪病裏懷鄉情倍深欲歸雙足誰攀蹶舊游

門巷綠陰重水檻玲瓏風四發荷花明豔持參差松吹輕涼波
瑟滑卽我桑園佳亦佳何嘗佻達歌城闕皓月依然照屋梁故
人千里山河越思心似繭不可抽急響如彈那能歇平生才短
情則長但恐愁多情亦竭何時按土幻成銀道逢黥卒如蕭渤
歸買鉏犁約耦耕不怕身宮坐磨蠍余命宮正坐磨蠍

紫雲山房看合歡花再次前韻

長安竹樹少于人眼不見花踰兩月街南客卿容我狂

謂曹慕堂先生

暇日屢通鈴下謁五架之堂簾靜垂一樹紅絲細于髮長纓濯

雨高覆檐碧羅翦葉低承轆醉心乍見手欲攀仰面貪看足幾

蹶卻惜青藤早落花不然紅紫相映發

樹旁有紫藤一架

坐使徐黃畫

不成交柯亂葉愁撓滑江南配爾唯紫薇惜哉北地園林闕倘

教輦致得比紅句擬羅虬定清越

紫薇合歡俗皆謂之百日紅

賞盡繁英直

到秋三徑涼風香不歇我年無忿不須蠲但憂窮蹙心思竭合
借濃陰掃地吟趺坐傳杯澆茗渤晝炕宵聶月惺忪絕少飛蚊
螫如蠍

明宣宗萬年餘樂圖

煙簑雨笠儼江湖一角遙山墨不枯應是生降元良哈歸來得
意寫新圖

想見臨池點筆時水波動盪樹淋漓後來吳偉稱宗派須識宣
皇是爾師

元王思善竹苞松茂圖

王生師李唐鉤勒畧小變雖亦斧劈皴衣帶不掣戰茲圖斯千
篇松竹鬱葱蒨枝柯頗猶人妙在鍼與箭風軒坐二兒幼者背
其面手書倦呀唔似有梨栗戀中婦貌清臞目兒手按線督課

若聞聲眉目甚昵眷嚴將慈意俱活脫溢生絹大兒解母意教
弟目斜眄不知當爾時背誦凡幾遍我展圖未窮我聲已哽咽
我母教我時儼若圖中見補紉守一鎗豔豔窗楞顫伊我弟與
兄左右擁書卷諷誦聲或低停鍼示微譴一去二十年流光掣
飛電荒陋負阿母饑寒去鄉縣松楸待手茭魚麥缺時薦誰歟
示此身爲我說法現掩卷不忍觀撲簌淚如霰

陳章侯聽蝶圖

圖爲一人絳袍仙桃巾作諦聽狀巾角

消息到王孫固知蝶語更妙天下
也丙寅暮春老蓮寫聽蝶圖一噓

禽言入歌謠蛩語最悽楚二族固多言未聞蝶有語老蓮吮柔
豪創格貌栩栩一人盛巾袍狀貌偉而古瞪睛諦聽之母乃師
曠侶我稽顙類繁名藝畧堪舉鳳皇子翩翩葛仙衣黠黠曬粉
門新裝鼓板逐輕舞菜蕒黃踏雪花圃紅浴雨相須輒俱飛所

遇鮮齟齬卽令語亦柔大抵近兒女此公森鬢髯奈何遽如許
或因討春行欲識看花所用是通殷勤聊復相爾汝繫我客未
歸讀書當消暑小園花信稀修路家書阻思憑邨裏來備述相
思苦蕉碧荷花丹傾心爲我吐飄然肯下來我耳傾以佇爲問
亡是公此意君其與

題仇英摹周文矩簪花圖

二周士女多豐肥沿唐習尙相因依句容妙筆傳者稀仇英摹
本其庶幾簪花得毋太真妃綠鬢低壓明月璣牡丹一笑迎朝
晞燕瘳何用來嘲譏雕闌定爾通彤闥芭蕉之花紅暎職雨三
竿竹翠鳳飛下有護草芳菲菲侍兒烏帽袍著緋永新念奴是
耶非金鴛鴦噴烟微微請更淡綠鮫絲衣叉竿乍立開窗扉令
我顧盼生光輝况坐比肩行驂駢阿瞞安得離禍機我口則誇

腹不誹東鄰西子南之威依人飛鳥誰能揮看花失路當知歸

敦庾體題仇英山水障子

飛閣出崇柯涼堂面芰荷蓮衣紅逼燒風蓋綠連坡停琴看去
舫屏扇緩徵歌何必誇金谷釵梁滿澗阿

家童解泛船移瓶就采蓮花香吹屋裏波影漾檐前蔭芙蓉雙
槳鴛鴦驚一川遙看臨玉檻相望擬金仙

跨水虹橋曲穿林石路分紅薇纔覆帳翠竹欲爲雲人衣薰水
麝花露瀉朝暉時非上巳日人或右將軍

娛情少長集招涼簾牖開桐花雪一片松林濤欲來投綸魚逐
餌理徑鵲銜苔可無白衣客來勸紫霞杯

風柳腰難似晴山眉不如樹濃根蔭暘橋深影憩漁棧香供鳧
藻滌硯活蟾蜍几案堆湘帙將母科斗書

夕霧如朝霧松林閒竹林嶺橫泉脈斷山轉寺門深未載步兵
酒還揮中散琴籜冠邛竹杖試此息機心

題龍舜耕

笠衫小像卽送之官蜀中

同學鍾繇正隸書寒鴉欲側滿窗塗于今二十年如水猶記風
儀上學初

鉞與笠衫同執經鍾實園先生先生工行楷書

十年插腳軟紅塵戴笠乘車見性真但恐參軍作蠻語空教人
憶畫中身

七夕雨

風花才散晚雲稠涼意侵簾急下鉤老酒拚供佳節雨深燈疑
坐故鄉樓三年瓜果虛今夕一枕蛩蛩送九秋多事荒唐說牛
女人閒如此不勝愁

題篆書九歌冊

翟翁精篆書筆與年俱健頗學李少溫力敵凡夫萬茅堂架空
山補綴寒藤蔓方瞳不眵昏尙善松屑飯卽茲九歌冊圓勁有
成憲其細不及絲其方不盈寸垂天蔚雲霞拔地茁萌蘢怪哉
毛錐子百用終不鈍龍眠圖九歌贗鼎十百論後來蕭與陳筆
墨不稍遜奈何鋟以木致有漫漶恨何時得粉本遂我合併願
張吳例可等用爲好古勸吾鄉蕭尺木有離騷經圖諸賢陳章侯有九歌圖俱鋟以木元張叔厚曾臨李伯時九歌圖吳孟思以小篆書其文

歸自京師料理荒齋四首

桑

與爾居八年枝葉未有害雷火雖半焦童童尙如蓋方春綴紫
花盛夏足青靄軒櫺便晏眠文酒藉嘉會匪惟息其陰重以知
天籟流傳到江湖好事競圖繪吳縣王井東詰儀徵尤貢別離夫蔭俱繪有古桑書屋圖另商

未逾時凋謝誠無奈豈無桃李花對此真曹鄴摩挲感物華生
意或可賴來年發孫枝酤酒根下酹

籬

籬籬欲朔風如醉人欲倒寒藤復糾纏踰踰愈難保呼僮急斷
竹先期刈衰艸縱橫復舊規指點趁清早稍稍鹿眼呈曲曲牆
根抱貧家只茅堂無事淨猶掃十二時不離八九步而過宵戴
白玉盤朝負黃綳襖欣然有餘歡頗覺此閒好旣以編蔓延兼
用蔽枯槁夏侯有妓衣我亦學其道

蕉

芭蕉忒易生亂插若葭莢遮檐緣無次決石勇能敢葉展太皞
旗根垂烈士膽受風衣綵繚迷霧水滄淡小樓如小船窗櫺瞰
商蓍清秋三日霖五夜一鐙學萬點萬愁生百聽百回感卸裝

冬欲初艸木氣以慘勞爾獨青青日夕邀我覽媿非袁安廬臥
雪夫誰頷

井

井水分西鄰坡老背有詠黃生家如之艸堂名以命無波心共
閑出戶冠且正有時繞闌干聊爾雜嘲評映竹寫青荷覆桑呈
綠鏡頰面須頰心鑒醜勿鑒覩昨行燕齊郊瓢飲老稚競苦尙
數里遙甘豈八家竝道賜強一嘗口咄究難竟棄捐此可憐移
置誰堪令況聞吸井華作使筋骨勁惜哉齒未礪枉對清如聖

題蕭春園 竹風蕉雨之居圖

三楹艸屋半扉柴竹子芭蕉到處皆補隙豫防雲入戶茂繁好
讓水流階卽無風雨陰都妙倘傍谿山致更佳我爲君家徵往
事直須題作小蕭齋

與邵季司

世勛

王子卿

澤

消寒識字

新歸謝紛拏舊學漸泛濫同心得二妙異室時一瞰六書我所
耽廿載復常三孽乳味偏有意義本平淡分隸滋變更譌替費
點勘砭俗雖多途宗許庶無憾一上示三王詰屈口如含造險
當履平步遠勿諱暫譬彼天際舟此實泊時纜窮冬百卉腓欲
雪簾牖暗酒卮或未擎更鼓已三摻吁嚟隱有聲童僕笑疑慙
忍貧茶久甘力學蔗初噉相期卒乃事山寺梅可探

城陰艸堂夜歸

王生南鄰黃梅花花枝正對門衡斜開門濃香進如堵溫磨和
月填其家我來城陰日停午我歸街鼓聲三搗肝脾沁入巷深
靜此時詎止思無邪

用東坡饋歲別歲守歲三詩韻題畫分贈同學諸子

傾貲事問道畫外詩爲佐禮經固有訓貧者不以貨準情爰古
先藉口到措大破窗風雪寒興發起高臥淋漓入我豪光采照
君座念茲星回天有如蟻旋磨攢眉千里游彈指卅年過所恨
酒尊空高唱屬誰和

汪君索我畫三月未嫌遲一朝奮柔毫恍如遭徵迫逼迫豈人
事我樂方無涯當其務慘淡至不知歲時得過且過耳安問瘦
與肥是中有真趣毋爲窮達悲相對正無事一醉何能辭願君
開畫社吾興猶未衰

畫筆若文筆天矯如龍蛇要令骨力見毋使水墨遮我手不應
心我口又奈何回顧流輩中讚嘆人人譁那知面壁時闔戶思
自撾千年未二十花鳥凌風斜多識固經訓玩物毋蹉跎此事
究藝耳齟齬不足誇

爲邵未齋先生畫息機軒圖用東坡粲字韻題之

軒爲先生

讀書處鉞六歲人學地也

憶昔入學初乙亥春已半蘇瓊喜有兒竊聽先生嘆

時先君歿未周年

是時園有桃兩眼不停翫牙牙急就篇大笑賀者散踉蹌追及門孤立泣無伴先生召之坐默默如鶻旦卽今畫中人猶據當時案榻來三十年心緒蓬麻亂與雞日俱興披衣忘嗽盥餐事急矣學問且姑緩譬八珍救死如散錢無貫先生曠達人立論振疲懦好我若歎痴與俗殊冰炭重思擔琴書開正同適館先生時應繁昌山長山縣嵐氣深江橋春漲暖暇作踏青游一攬三英粲山也

季司學摹印詩以示之

摹印雖小道秦書八體一此別有師承不從六書出固者執偏

旁謂失造字實點畫依說文往往邊幅溢當年馬伏波思救成
舉失紛紛白下羊錯亂不可律卽今譜史傳譌瞽十居七一二
千古入組綬閒遺逸文字畧如今合古所難必不聞于爾時召
正事訶叱古有印正乃知撥蠟人豈必有經術自從石印興文士始
親暱王冕實權輿文彭漸工密下至何震與胡正言更僕數難
悉婀娜趨宋元變易不遑恤如臨古法書漢印鍾王匹如摹古
名畫漢印顧陸筆緣梯必循枕得泉忽忘繙我年十五六心志
頗專壹但解工者佳古拙目深疾近今四五年如物乍髹漆光
采所發輝公然見形質十或得二三狂喜輒連日君今何勇銳
新硯方礪畢窮日夜追摹欲造古人室漢魏與宋元是中分作
述可浥彼注茲毋舍甲取乙一藝苟得成千秋名不汨努力君
志堅吁嗟予手拮

郊行書所見

瓜瓠壓屋林葉黃門前稻孫青勝秧雞聲聞暢人語樂谿烟炊
出松毛香人生大欲一飽足底事舟車徧川陸請看穰穰運租
船豈無一匙歸我腹西風乍緊籬菊開鈴轔病蝶爭裏回酒錢
縱無意亦得況有霜月當頭來

清明過淮陰侯祠

紛紛壺榼莽澆山此地歸鴉自在閒依舊艱難唯一飯黃昏小
雨廟門關

待牖寺前鎮

紅藥黃薔取次開戴園西去錦成堆春游事事關心甚不爲飢
寒催不來

題艤舟待月圖

櫪頭艇子不安窗前貯茶籃後酒缸莫訝主人殊好事曾尋詩
派過西江

向晚清光落酒杯吟懷都趁野蓮開何人爲我邀新月喚取初

三初四來

圖中有
二童子

壹齋集卷四

當塗黃鉞左田

古今體詩五十六首

蓋甲辰一年

井西書屋分賦得撲滿貫索

凡物毀因成斯器成爲毀凡物毀則驚斯器毀乃喜匪喜其器
毀喜其得錢耳得錢爲何狀團團質麤鄙空洞無所容見表可
知裏自從混沌鑿哆口饒不已一日受一錢而腹彭亨矣兒童
見汝謹奉之列筵几貪夫見汝愛藏之在牀第將滿未滿時貴
重無可擬及當旣滿後猶謂中足恃那知羣兒愚棄置如敝屣
碎身不須與損益道如此我欲收其餘滌以廉泉水馳詞告旌
人令之不入市

索麻以爲貫其用二五偶

江南以麻爲之貫千錢爲一束

遠致千里

程儲可十年久出入隨孔方其究非已有所樂在交結藉以能
左右嗟汝初生時亭亭在田畝蓬且不扶直爾身諒不苟奈何
爲錢愚束縛爲其守坐使猗頓豪驅策牛馬走達人爲貫過謂
非汝之咎憤者探其源謂是罪之首向使爾不爲一屋散誰受
齊楚說紛然我言一笑剖不聞中道絕枉使錢滿手棄擲大道
旁不待太府朽

與友園夜坐

月影過牆一半差縣樓更鼓已三撾不知夜坐有何樂難得此
身今在家連日清光同潑水今年小聚類搏沙閒人豈少君與
我不在山城卽水涯

時鐵君在京
家兄客武昌

糗

蒸淘選黃糯包裹用青蒲嗜好因成俗蛟龍枉受誣赤心嘗借

棗三角可名弧見說楊梅熟殷勤覓得無

五月十二日偕邵劍門

士昆

王子卿

澤

過蕭春園家因

留小飲

界畫閒廳作小齋賞心書畫兩邊開頗聞無事此靜坐恰好三人不速來幾陣竹風醒尙未連宵梅雨足應該談深似覺頭風愈破例爲君覆滿杯

同人招集三昧庵消夏病不果赴

不到精藍近十旬眼前風景記來真當門山學佛頭翠繞屋樹如鼠尾皴已分與僧同過夏卻憐因病久拋春諸君莫笑游情減新與維摩作後身

子卿新結文社勵之以詩

作文貴學識爲詩先性情二者不可兼專一家以成然而古之

人兩事恒齊名多由讀書到乃令一理并李杜盛文章不僅以詩鳴韓蘇大手筆潮海相嵒嶸上溯漢魏晉下逮宋元明傳者例雙擅一一出語驚自從制藝作漸與風雅爭秀才變學究日坐煩惱城謂詩妨舉業用以戒後生門下竊拈美教約如誓盟曷不讀毛詩求友鳴嚶嚶曷不觀虞書明良方載賡乃使好資質摧折由勾萌經書束高閣時文案縱橫千家襲一謬塵飯而塗羹富思急入學貧早謀舌耕閒亦取科第鄙陋如吳儉誇張向寒儉鼓腹矜膨脝通人或解后言談費支撐每於赤牘中時作墨卷聲我年過三十無名鄉里輕南北凡七試瑣瑣心忤忤制科兩乙等拜賜文綺榮歸來讀書史埋頭對鐙檠底須委時命畢竟詞不宏輒引以自責又復爲君呈君詩筆甚秀君文格甚清但坐往不勇是以思欠精昨朝聞社集文戰招強勍

延敵務勝敵射箭必射正博觀約以取官止神自行詩文固一
貫此筆無變更慎勿功名心而與學問縈試觀古作者不必皆
公卿我身已落拓我言爲謬評自悞還悞人大笑冠絕纓

大兄自岳州歸爲言岳陽樓之勝作歌紀之

吾兄一載爲楚游興盡遽返山陰舟歸裝莫訝薄如紙中有突
兀三飛樓仲宣岳陽復黃鶴眼底山川言鑿鑿岳陽最久最奇
觀萬里湖天相噴薄是時春水綠方生湘君山色纖蛾橫不知
混沌之始何人墜此境乃令萬古磨逾明更言月色妙天下自
有此生無此夜目光化作水晶寒天色都成濕銀冶書生空讀
文正文有景誰能對景寫回頭顧我語未終弟縱有筆難爲工
仙人黃鶴不可逢仲宣作賦聲摩空至今江渚樓重重我過但
覺耳目隘爲有波濤汨沒萬派來心胷弟縱有筆難爲工

謝人惠君山茶

君山自昔唯聞酒何日叢生粟粒芽爲說近年新入貢一緘珍
重裏青紗

平生解笑盧仝俗佳茗何須七椀多一勺朝來傾石鉢盪曾都
是洞庭波

題畫爲友園作

作畫半載前題畫半載後謂非嬾且俗何以遲之久憶當鐙市
闌草堂月當牖君家好兄弟約我把卮酒半酣出此紙揮灑任
吾手君從旁叫絕詫謂我未有德惠卒其業更深棄之走自是
無好懷失意常八九書卷束高閣貧病萃淵藪豈微眼散花漸
且柳生肘昨朝爲裝潢將欲懸座右卷送識歲時意且珍重守
驀然聞此言不覺地觸首君畫早入格落筆可不朽奈何厭家

珍而欲享敝帚將毋嬖此佳愛而忘其醜不然坡效谷滑稽事
之偶聊爾漫誌之慚媿謝吾友

同人再飲春園家歸而述此

又向蕭家去閒人聚一廳計時方換甲算客少雙丁

友園劍牆門未至

竹陰逾碧盆荷花漸馨風從巷口送雲到屋頭停泛椀開芳蕊

釘盤刷茯苓

時以茯苓餽客

飽元非是癡狂本不因醒發難何殊子

精言欲僭經看收如火日旋出撒沙星選地鋪筠席移鐙背竹

櫺酒疑遠水綠月學畫睂青籠鳥頻驚宿鄰歌勿細聆口占吟

偈僂

盤中設豆大不側翁爲令具因戲聯句偈僂僂僂蔡中郎短人賦

拇戰判畦町消夏經三

集青春罄幾瓶流光旋磨蟻浪跡逐波萍舊雨兼新雨長亭更

短亭十年車載轉何日戶纔扁頗以游爲倦因之性不靈休譏

長戚戚不解假惺惺魚樂何關我心勞漸及形歡娛成感嘆未

免不中聽

偶於舊藁中得乙未中秋與施杲亭邵友園兄弟絡繹
聯句詩杲亭歿五年矣傷勝友之不作慨良會之云遙
追錄其詩或不致人琴俱寂耳

秋陰聚檐月絡繹鳴深宵變高寒抱庭葉斷續隨林飊道寸腸

辨經緯衆夢憑理科變紡車凌空支修夜迎風捎變觸手亂千

緒孤輪時一調變絲絲漸酸楚稍稍爭謹嗽道精神運兩翼清

越千層霄變抽訝獨繭蛹織鄙當窗蛸變豈伊朱絲直不畏風

力變騎涼秋蒼苗賴蜚紛啾啾道臨高一振響異族皆潛跳

鐙變坐使商聽滿驀令充耳聒變人語亂斗室塵寢醒覆蕉變澀

豈蛩咽露急越蟬鳴條道有如雙輪車路入羊腸遙變又若萬

斛船纜曳春冰消變入破鐵笛裂出爨枯桐焦變竈雞不敢和

百舌皆上橋

光道

領高疎雨滴天近雲磬飄士似變宮變徵實非

管非驚

鐵

大聲倏岑寂細響猶呖士嘆懷頓開暢清思何高

超

光道

巧詠訴幽夜私語呢芳朝士暗泣小兒啼列唱織女嬌鐵

頓爾恩怨明更令聲聞昭士聯吟恰會合反覆相歌謠光道須知

小物微何以堪士鐫雕士鐫鐫燈黯別室壁月低繁梢鐵霜蕊燦餘

綺寒雲漾輕綃士終夕竟虛織徒令音嘒嘒光道

夜坐和清翁病字韻二首

西風剽涼雨萬卉蘇百病濕雲飛半空明月白滿徑息彼蕉梧

陰遂我林野性一鐙兄及弟默默艸堂靜

挽磴獅子驄已無萬里氣宿肉雖爲熬豈復八珍味我必尋坦

塗何人蹈危地簔裘兩可御堂雨以時至

小雨過子卿家時子卿病起

秋霖撥悶苦無端，傾蓋來謀半日歡。
小愈正當思客話，新涼斗覺似春寒。
對聽細溜排簷滴，起把殘書倚柱看。
不是阿戎談不厭，都緣縱適總心安。

食蟬戲作

王生書塾歸，衣帶見郭索，似聞擒者呼介士，就束縛，義爲知己死，不受惡少惡我朝，食指動佳月，赴良約，入門秋滿，槃明月互吞，嚼江湖方朝魁，穉穉競相攫，奈何游不時，使我饒名博，重陽一月耳，竟不甘寂寞，但恐桂花開，直待菊英落，大索汝難逃，莫怪秦虜虐。

友園東田子卿約爲煮茗看月之會，因歌其事

交柯亂葉紛如麻，五枝十枝黃葵花。
花光側瀉杯中茶，頓令色香味有加。
中秋已近秋風賒，頗覺喜氣生人家。
王子清修言不

譚邵生砥行無纖瑕會稽竹箭青門瓜供我叱石耕金華碧天
如洗冰輪斜我愛翫之生咨嗟如背大癢不可爬徑欲飛步凌
烟霞若有人兮以手遮天門遙遙未敢撓自悔一念由來差不
知許事且浮誇吟嘯大適思無邪矮紙往往紫秋蛇覓得七分
讀亦嘉我生正類焦穀芽公等乃是三春葩倘思一漑遣水車
端賴玉樹霑蒹葭竭來聚散真搏沙重陽以後舟思拏我歌屬
和公毋詫免令別後雙手叉臨風對月懷天涯

題寢游圖

周官占六寢思者十之七關尹別五好幻境亦匪一大都因想
成豈以所見實自人情嗜紛闔眼故吾失求錢寢穢祥欲爵見
鵲吉頓令衽席閒祕此富貴術旦晝所未能昔昔諸相出枕中
事已陳蕉下鹿何恤甚至登蟻堂甚至入鼠室甚至獨寐慚甚

至同舍匿大哉黑甜鄉廣漠乃無匹斯游欲何之意境甚超逸
公然入畫圖不怕癡人詰山林川澤閒仁知兩可律夜樂象止
此畫爲事可必勸君勤來游此地不妨密三百有六旬但去庚
申日

栗

不數漁陽與范陽宣州要比易州良蒼蓬零後蝟毛磔黃玉蒸
來巖桂香酒半棗梨時閒出鐙前兒女亦分嘗登高節近宜多
食免試徐生腳弱方

鯽魚

西風平渚潮痕退鮮鯽真同措大多一丈游絲縈翠竹半藍秋
水養青荷鱸材儉稱高人饌鮭菜饒令下客歌飽食老饕誠過
分敢將風味望灤河

芫菱

不起薑心不作花
青青猶似種平沙
休欺一寸臨風葉
曾上三秋犯斗槎
氣味直宜呼芥友
性情強半類薑芽
食鮭賴爾真香口
白茹黃蘇總覺差

筍乾

勾取琅玕千萬枝
和風帶雨送鹽池
此君淡永元相稱
清貧也恰宜
味道好從佳境入
參禪直到已枯時
松肪蒲朮青苔脯
爭敵臣家玉版師

五雜組十一首

五雜組刀圭藥
往復還寒熱
瘧不得已
抱佛腳
五雜組良蜩身
往復還權貴
門不得已爲高人
五雜組兒負襁
往復還蛛布網
不得已出塵想

五雜組鴛央偶往復還歸甯婦不得已空房守
五雜組科場筆往復還風簷日不得已又坦率
五雜組設色畫往復還臨歧話不得已去所愛
五雜組辟兵符往復還耕田夫不得已食無魚
五雜組江淮雉往復還燕趙士不得已說雨是
五雜組刀鋸貝往復還新舊債不得已又稱貸
五雜組虹斷續往復還雷亭輓不得已天雨粟
五雜組桃源洞往復還蕉鹿夢不得已談言中

過舅氏園有感

無復沿溪野竹攢水痕猶齧舊闌干游人但解尋殘菊閒殺一
叢秋牡丹

丹楓烏柏天然畫設色吳裝得似無輸與門前一渠水平鋪烟

月儘鉤摹

松子成林還結子園丁娶婦又添丁當時座客唯余少也閱人
閒幾醉醒

嘲菊

秋鞠有佳色佳色厥惟黃一本備四時所以應中央後來入醫
藥始說白者良然而紅閒紫不聞藝柴桑自從石湖譜異種誇
東陽大都皆苦蕙色媚花不芳遂使偽亂真婢學夫人妝可憐
我家花委棄東籬傍江鄉秋雨晴尋菊人人忙尻股路相接百
十填僧房是何淵明多愛之不能忘張鎰助花豔覆席留花光
誇張到兒童品目傳西洋冤哉霜下傑遭此暗中傷我欲執人
裾指點非治牆不惟不謂然笑我真風狂博物不成名花神將
見殃改顏一粲然迂闊誠荒唐芎藭類蘂本蘼蕪似蛇牀微乎

土續斷亦曾王者香大同而小異草木難具詳臨風且姑賞耳
目為輝煌

大風抵九江關

前年涉險南陽湖杯中羹覆衾稠汚幸哉風便一日耳不然吾

其為湖魚

辛丑秋七月歸自京師濟甯大水泛南陽湖舟幾覆

三年足跡履平地噩寢往

往猶驚余昨朝訪客溯江漢失意復坐饑來驅扁舟三日七百

里狂飈扇月光模糊衝灣潑岸莫達且累我鼻息難鼾呼康郎

彭郎巧結束小姑一髻凌晨梳背聞人道久健羨及今日見唯

歛歛風波如此境皆惡斯游自笑胡為乎斜陽到關眾皆賀無

錢誰買波神緒新詩衰瑟亦安用驚惶面目慚匡廬

留九江大風

浪湧船低昂禮鼠相拱揖惡風往參焉擠之不能立龍開河水

道士泐

山勢束全楚奔濤怒復回飛帆舉驚電客枕門春雷旣濟魂猶悸同人色盡灰洄流雖可避難避厭風來山罅扇風遠可十里外舟人呼爲厭風

閣淺

萬馬奔去帆我舟忽入定風狂吼松杉水激亂鐘磬衆方獅子搏彼若野狐聽氣豪降愈難力盡戰不勝苦思神龍負巨耐鬼母孕剗中出肝腸忍饑置餌出所載十之三舟始活魚潛尾忽掉蛇擊首相應曷哉衆無譁行矣言有贈疾走讓小兒蹉跎屬不佞計較夜來程莫補朝行剩所以澹臺生一生不由徑舟人貪風利通夜不寐遂膠于沙

觀戚叔楷

子模

作花鳥因贈

黃筌寫生法徐熙落墨花兩家子弟賢不辨黎與檀後來花鳥

科百十專其家趙昌艾宣輩輒爲東坡誇我生鑒不精安敢肆
齒牙臨撫或失實奚止豪釐差聊數耳目觀及曾歸畫又老蓮
格奇古少斧神清華石田與白陽點墨含烟霞妙哉南田生古
豔傳新葩獨賞江南工膠粉無纖瑕自是繼者誰彩筆歸南沙
其餘詭寫意大葉塗寒雅譬如丹鼎藥液去存者渣就中李復
堂鰾奇氣不可遮尙嫌芒角露肝肺多槎枒君今學惲格春色
豪端賒鴛鴦臥竹石雪兔藏山茶牛腰束粉本用儉取則奢昨
聞贈我畫羅裏堆窗紗旁觀竊健羨如癢急欲爬踰牆巧偷去
此賊亦足嘉可知君藝精清俗人人譁努力當盛年歲月如風
蛇毋令毘陵後觀止蔑以加

贈王井東

詩

三十韻

王居洞
庭西山

聞說西山好先生有數椽秀分縹渺半雄覽具區全闢戶雲侵

楊鉤窗水接天使船真是馬

湖中有赤馬船

種橘盡成田蠶事三春後

民風太古前吹簫無入市

山中無巧者

結網半臨淵畫境兼詩境斜

川更輞川此閒真樂土何日遂幽遷雅稱高人宅狂吟在澗篇

胡爲乘雪舫也學出山泉一櫂凌三楚行窩住十年名隨江漢

遠心實寢魂牽後輩推曹霸前身合鄭虔移文唯恐勒襍被久

思還昔我書曾寄多君約且堅草堂如畫裏酒盞共誰邊

君爲臨趙

幹松雲草堂寄鉞且訂卜鄰之約

覲面知何處論心只自憐江萍吹恰合沙鳥

聚連翩不怕風波惡來因筆墨緣久欽買島佛竟遇石湖仙著

論精如子談諧妙入禪等身攬卷軸著手散雲煙始信魔當鍊

時出鍊魔圖相示

相看忿盡蠲幕歸思病愈小住爲子延已辦舟同去

還愁纔解先

君時有湖南之行

卜鄰須共井

鉞亦號井西

挂杖惜無錢廡下

春堪賃山中雲可眠招詞如謾與此舉豈徒然漁具詩同補山

居賦共編斯言吾不食早晚附眾船

贈寫真郭漁山

郭公畫人如畫山鉤染皴捺非等閒秀者窈窕凌烟鬢蒼者刻
露如皴顏墨少少許赭不殷人閒脂粉皆可刪相逢清漢滄江
灣貌我左田蕉林閒爲寫左田蕉林二照識與不識皆來覲共道意態何
幽嫺不知出自霜毛斑開年攜之歸柴關定遭妻子相譏訕非
仙非佛非癡頑胡爲化作三身還

憶阿三

阿三真類我隨事有天真眉目疏如畫精神大似身五年能把
筆一別又交春浪跡成何事勞渠入寢頻

金葉山戚叔楷爲余合作歲朝圖花鳥蟲魚蔬果無不
有也戲題絕句

枯小艇百十集股結而尻連此出彼已襲風聲井市聲兩耳聽
不及自從泊銅陵目未睹城邑三日不卸帆我行有底急咫尺
庾亮樓不得一拾級但見白獅子跳躑怒未息猶有渡江人揚
帆不用楫

江行雜詩

大風脫險馬當舟天際廬山翠影浮畢竟何人纔識面賺他過
客盡回頭幾時雲霧身如置隨分庵廬住便休只恐歸來容易
忘先樵一角寄同游

酒渴江清喚奈何琵琶爭及破舢歌風波稍定客懷好游跡初
經詩意多到耳語音隨地改隔江燈火共星羅居然兄弟聯牀
臥妒殺征鴻斷續過時大兄同行

小孤以上山如畫大雪將過柳尙濃風利那容閒眺望峯高總

覺氣春容爽心石銚茶新熟失意泥壘酒破封所載酒酸不可飲卻畏
篷窗寒又暗自攀生絹當簾重

曉夜頻驚白領烏一舟秦越強同居埋名已任人呼馬作戲何
堪兒牧豬千里畫圖行過半一天風雨勢來初浪游可惜無詩
伴篷鐺吟成嬾細書

枕上聞風聲不寐

萬壑松濤萬派泉山高雨驟四更天此時試作茅庵想也合驚
回定後禪

舟人以廿八錢買一貓不捕鼠而善盜怒欲沈之江旋
以衆勸放之江岸戲爲放貓詩以警貓之不能捕鼠者
貓性最陰柔本屬不仁獸向無捕鼠功誰復家爲畜昨登楚人
船羣鼠夜發覆竊齧翻瓶罌攀援等獐狖此時憶狸奴何惜千

金購詰朝語榜人入市欣有售身作蘆花斑黻如大鳥味論相
頗無取所願實不副或者藉安眠孰知事果謬盜暴全不悛跳
梁尙如舊貓乃事深藏避鼠如避寇蒙頭灰洞眠澤吻鼃鰕候
擊鉢呼之來搖尾始一就稍見足跟移先看鼻端黠饒只伺魚
籃賊不窺鼠竇一飯三遺矢到處有餘臭種種嬾不堪色相無
一漏行客笑且譁榜人怒而詬竟欲沈之江不令旁觀救我前
爲致詞三殺還三省罪誠烏得無殺亦未免驟不聞雞失晨湯
火急相授不問主亡財闕犬前自首靈蠢任物情參養誰勸作
不如送之岸或亦懲其後我非婦人仁未免小儒陋但覺天地
閒似此不勝究貓乎好自爲是殆不可又

新開鎮以上水溜沙漲非風不行

盤渦轉車輪灘渾互包裹孤舟三日留縮手不得過平明強泝

洞一步幾頓挫篙師裸而撐貼地唯欠臥少進鮎上竿稍縱驢
旋磨巨堪水鱗凸又值帆腹餓須與蛇倒退仿佛口出匪三上
三不報一憩一同情彼險本生成我遭適輒軻今茲分寸難昔
者風浪播斯游卽無名此罪胡爲坐投箋告江神肅操不覺菱

阻風鯉魚山對岸

富池臨江小山

難得篷窗半日閒天教看盡兩邊山雨晴霧斂峯全露潮退沙
平江更繚選樹烏都投樹宿扳魚人又賣魚還船梢坐待斜陽
沒大勝無名洲渚閒

劉官磯

安穩劉官磯上過舵牙斗轉失盤渦帆如沙鳥聚還散山比夏
雪奇更多數盡隻雙江上堠難分大小眼中波蘄州忽報船頭
是附郭曾無竹一窠

從來百巧出窮人一卷丹青勝五辛
歸向妻孥誇骨董家園無此好新春